

Curreger mancanzas gravantas

Las propostas e recumandaziuns da la cumissiun d'inquisiziun duain vegnir realisadas svelt

MARTIN CABALZAR/FMR

■ **En connex cun l'affera dal cartel da construcziun e dal revelader Adam Quadroni ha la cumissiun parlamentara d'inquisiziun constatà differentas mancanzas gravantas tant tar la Polizia chantunala sco tar auters posts involvids.** Tenor il rapport intermediar da la cumissiun d'inquisiziun èn vegnidas scuvidas intginas mancanzas gravantas en connex cun las trais acziuns da polizia. La cumissiun parlamentara ha pretendì che questas mancanzas stoppian vegnir curregidas uschè spert sco pussaivel. La regenza cundivida l'avis che l'elavuraziun autocritica da las recumandaziuns d'agir postuladas en il rapport è d'impurtonza centrala per prevegnir en l'avegnir a situaziuns sumegliantas. «La gronda part da las recumandaziuns èn gia realisadas u almain instradadas», constatescha la regenza en sia resposta sin l'intervenziun parlamentara da la fracziun burgais-democratica (PBD).

Mancanzas gravantas

«Las enconuschientschas decisivas tar la documentaziun dals acts administrativs èn vegnidas registradas en ina dimensiun e qualitad minimala, ubain insumma betg», crititgescha la PBD. Era l'attenziun giuridica na saja per part betg vegnida concedida a las persunas pertutgadas. Plinavant n'haja l'investigaziun per gronda part betg pudì sa basar sin documents existents u mo sporadicamain. «Las circumstanzas e conclusiuns han perquai per part stuì vegnir rimnadas en

La cumissiun d'inquisiziun ha constatà grondas mancanzas formalas tant tar la rapportaziun sco tar las proceduras da la polizia, sco er tar auters posts involvids en il cas Quadroni.

interrogaziuns posteriuras, quai che ha chaschunà gronda lavur e blers custs», constatescha l'emprim signatur *Kenneth Danuser* (PBD Tusaun). Er sajan vegnidas scuvidas mancanzas en il cumportament da direcziun, la communicaziun saja stada insufficienta ed haja uschia provocà in cumportament sbaglià. Spezi almain saja er vegnì remartgà ch'instrucziuns da servetsch internas sajan vegnidas applitgadas per part mo marginalmain.

Ils 17 signatur da la PBD vulan perquai savair da la regenza tge conclusiuns ch'ins haja tratg dal rapport e tge recumandaziuns che sajan gia vegnidas instradadas ni realisadas sin plaun administrativ. Plinavant vulan ils interpellants intervegnir, schebain il personal haja absolvi curs supplementars da perfecziun e giudì in accompagnament professiunal (coaching) adattà e sche tschertas disposiziuns prendidas en mira dovrian eventualmain ina nova basa legala.

Realisaziun è avanzada

En num da la regenza conferma il minister da polizia *Peter Peyer* (PS) che la realisaziun da las recumandaziuns d'agir sajan gia progredidas fitg. «Per scolar e sensibilisar collavuraturas e collavuratur per las reglas da recusaziun en proceduras currentas è vegnì svilupà da l'uffizi da personal in 'codex da cumportament' cumplessiv», accentuescha Peyer. Ultra da la Polizia chantunala e dals organs d'inquisiziun haja era l'Uffizi dals servetschs socials surpiglià questas recumandaziuns. En il management da qua-

litad hajan ins er integrà directivas co tractar conflicts d'interess e tematisà la situaziun particularara da persunas en uffizi accessori ni volutar en las differentas organisaziuns pertutgadas. Differentas proceduras sajan vegnidas definidas cun documents standardisads e l'obligaziun da documentaziun per la polizia precisadas tenor il sistem da rapportaziun applitgà da 19 corps da polizia en Svizra. Rinforzada vegnia er la formaziun e perfecziun, quia tant per la Polizia chantunala, per ils medis uffizials, per ils servetschs socials e per l'Uffizi da sanadad.

Incumbensas e structuradas

Sin incumbensa dal Departament da giustizia, segirezza e sanadad ha la Polizia chantunala gia cumenzà avant passa dus onns cun l'examinaziun da prestaziuns ed incumbensas sco era l'organisaziun da las structuradas. «La finamira è da qualifitgar la Polizia chantunala uschia ch'ella possa dumagnar las grondas sfidas actualas e futuras cun in'organisaziun adattada, moderna e flexibla», scriva la regenza. Sco mesiras concretas menziunescha la regenza l'adattaziun da las structuradas da commando, il rinforz da la scolaziun e perfecziun, il coaching e la controlla d'efficacità. Per augmentar la qualitad en la direcziun è il dumber da 14 collavuratur vegnì reduci a maximalmain 5 fin 7 collavuratur per manader. Sche questa reorganisaziun bagegna la finala in'adattaziun da las leschas vertentas vegnia dentant anc pir a sa musar, scriva la regenza.